

四庫全書

集部

欽定四庫全書

萬首唐人絕句卷四十

宋 洪邁 編

七言

霜月

李商隱

初聞征鴈已無蟬
百尺樓南水接天
青女素娥俱耐冷
月中霜裏鬪嬋娟

人欲

人欲天從竟不疑莫言圓蓋便無私秦中已久烏頭白
却是君王未備知

華山題王母祠

蓮華峯下鎖彫梁此去瑤池地共長好為麻姑到東海
勸栽黃竹莫栽桑

華清宮二首

華清恩幸古無倫猶恐蛾眉不勝人未免被他褒女笑
只教天子暫蒙塵

朝元閣迴羽衣新
首按昭陽第一人
當日不求高處舞
可能天下有邊塵

北齊二首

一笑相傾國便亡
何勞荆棘始堪傷
小憐玉體橫陳夜
已報周師入晉陽

巧笑知堪敵萬機
傾城最在著戎衣
晉陽已陷休回顧
更請君王獵一圍

復京

敵騎縱橫一戰推萬靈回首賀軒臺天教李令心如日
可要昭陵石馬來

渾河中

九廟無塵八馬回奉天城壘長春苔咸陽原上英雄骨
半向君家養馬來

咸陽

咸陽宮闕蔚嵯峨六國樓臺艷綺羅自是當時天帝醉
不關秦地有山河

同崔八詣藥山訪融禪師

共受征南不次恩，報恩唯是有忘言。
巖花澗草西林路，未見高僧且見猿。

夜雨寄北

君問歸期未有期，巴山夜雨漲秋池。
何當共翦西窗燭，却話巴山夜雨時。

石榴

榴枝婀娜榴實繁，榴膜輕明榴子鮮。
可羨瑤池碧桃樹。

碧桃紅頰一千年

初起

想像咸池日欲光
五更鐘後更回腸
三年苦霧巴江水
不為離人照屋梁

柳

柳映江潭底有情
望中頻遣客心驚
巴雷隱隱千山外
更作章臺走馬聲

宿駱氏亭寄懷崔雍

竹塢無塵水檻清同心迢遞隔重城秋陰不散霜飛晚
留得枯荷聽雨聲

夢澤

夢澤悲風動白茅楚王葬盡滿城嬌未知歌舞能多少
虛減官厨為細腰

贈歌妓二首

水精如意玉連環下蔡城危莫破顏紅綻櫻桃含白雪
斷腸聲裏唱陽關

白日相思不奈何
嚴城清夜斷經過
只知解道春來瘦
不道春來獨自多

寄令狐郎中

嵩雲秦樹久離居
雙鯉迢迢一紙書
休問梁園舊賓客
茂陵秋雨病相如

漫成

不妨何范盡詩家
未解當年重物
華遠把龍山千里雪
將來擬並洛陽花

無題

百道縈回入暮霞
斑駁嘶斷七香車
春風自共何人笑
枉破陽城十萬家

杜司勳

高樓風雨感斯文
短翼差池不及羣
刻意傷春復傷別
人間惟有杜司勳

岳陽樓二首

欲為平生一散愁
洞庭湖上岳陽樓
可憐萬里堪乘興

枉是蛟龍解覆舟

漢水方城帶百蠻
四隣誰道亂周班
如何一夢高唐雨
自此無心入武關

寄成都二從事

家近紅渠曲水濱
全家羅襪起秋塵
莫將越客千絲網
網得西施別贈人

屏風

六曲連環接翠帷
高樓半夜酒醒時
掩燈遮霧密如此

雨落月明俱不知

春日

欲入盧家白玉堂
新春催破舞衣裳
蝶銜花葉蜂銜粉
共助青樓一日忙

贈白道者

十二樓前再拜辭
靈風正滿碧桃枝
壺中若是有天地
又向壺中傷別離

無題

聞道閨門萼綠華昔年相望抵天涯豈知一夜秦樓客
偷看吳王苑內花

漢宮詞

青雀西飛竟未回君王長在集靈臺侍臣最有相如渴
不賜金莖露一盃

蝶二首

長眉畫了繡簾開碧玉行收白玉臺為問翠釵釵上鳳
不知香頸為誰回

壽陽公主嫁時妝八字宮眉捧額黃見我佯羞頻照影
不知身屬冶遊郎

隋宮

乘興南遊不戒嚴九重誰省諫書函春風舉國裁宮錦
半作障泥半作帆

代應

溝水分流西復東九秋霜月五更風離鸞別鳳今何在
十二玉樓空復空

席上作

澹雲輕雨拂高唐玉殿秋來夜正長
料得也應憐宗玉
一生唯事楚襄王

訪隱者不遇成二絕

秋水悠悠浸墅扉
夢中來數覺來希
玄蟬聲盡葉黃
落一樹冬青人未歸

城郭休過識者希
哀猿啼處有柴扉
滄江白日樵漁路
日暮歸來雨滿衣

破鏡

玉匣清光不復持
菱花散亂月輪虧
秦臺一照山雞後
便是孤鸞罷舞時

無題

紫府仙人號寶燈
雲漿未飲結成冰
如何雪月交光夜
更在瑤臺十二層

贈庾十二朱版

時庾在翰林
朱書版也

固漆投膠不可開
贈君珍重抵瓊瑰
君王曉坐金鑾殿

只待相如草詔來

柳

曾逐東風拂舞筵
樂游春苑斷腸天
如何肯到清秋日
已帶斜陽又帶蟬

三月十日流盃亭

身屬中軍少得歸
木蘭花盡失春期
偷隨柳絮到城外
行過水西聞子規

過招國李家南園二首

潘岳無妻客為愁
新人來坐舊粧樓
春風猶自疑聯句
雪絮相和飛不休

長亭歲盡雪如波
此去秦關路幾多
唯有夢中相近分
卧來無睡欲如何

留贈畏之二首

待得郎來月已低
寒暄不道醉如泥
五更又欲向何處
騎馬出門烏夜啼

戶外重陰黯不開
含羞迎夜復臨臺
瀟湘浪上有煙景

安得好風吹汝來

為有

為有雲屏無限嬌
鳳城寒盡怕春宵
無端嫁得金龜婿
辜負香衾事早朝

公子

外戚封侯自有恩
平明通籍九華門
金唐公主年應小
二十君王未許婚

雞

稻梁猶足活諸鷄
妬敵專場好自娛
可要五更驚穩夢
不辭風雪為陽烏

壬申閏秋題贈烏鵲

繞樹無依月正高
鄴城新淚濺雲袍
幾年始得逢秋閏
兩度填河莫告勞

端居

遠書歸夢兩悠悠
只有空牀敵素秋
堦下青苔與紅樹
雨中寥落月中愁

夜半

三更三點萬家眠
露欲為霜月墮烟
鬪鼠上牀蝙蝠出
王琴時動倚窻絃

飲席代官妓贈兩從事

新人橋上著春衫
舊主江邊側帽簷
願得化為紅綬帶
許教雙鳳一時銜

代魏宮私贈

來時西館阻佳期
去後漳河隔夢思
知有宓妃無限意

春松秋菊可同時

代元城吳令暗為答

背闕歸藩路欲分水邊風日半西
曛荆王枕上元無夢
莫枉陽臺一片雲

詠史

北湖南埭水漫漫一片降旗百尺竿
三百年間同曉夢
鍾山何處有龍盤

日射

日射紗窓風撼扉香羅掩手春事違回廊四合掩寂寞
碧鸚鵡對紅薔薇

題鵝

眠沙卧水自成羣曲岸殘陽極浦雲那解將心憐孔翠
羈雌長共故雄分

梓潼

梓潼不見馬相如更欲南行問酒壚行到巴西覓譙秀
巴西唯是有寒蕪

青陵臺

青陵臺畔日光斜，萬古貞魂倚暮霞。
莫許韓憑為蛺蝶，等閒飛上別枝花。

東還

自有仙才自不知，十年長夢采華芝。
秋風動地黃雲暮，歸去嵩陽尋舊師。

漢宮

通靈夜醮達清晨，承露盤晞甲帳春。
王母西歸方朔去。

更須重見李夫人

江東

驚魚潑刺燕翩翩
獨自江東上釣船
今日春光太漂蕩
謝家輕絮沈郎錢

灞岸

山東今歲點行頻
幾處冤魂哭塞塵
灞水橋邊倚華表
平時二月有東巡

送臻師二首

昔去靈山非拂席
今來滄海欲求珠
楞伽頂上清涼地
善眼仙人憶我無

苦海迷途去未因
東方過此幾微塵
何當百億蓮花上
一一蓮花見佛身

七夕

鸞扇斜分鳳幄開
星橋橫過鵲飛回
爭將世上無期別
換得年年一度來

馬嵬

冀馬燕犀動地來自埋紅粉自成灰
君王若道能傾國
玉輦何由過馬嵬

望喜驛別嘉陵江水二絕

嘉陵江水此東流
望喜樓中憶閬州
若到閬州還赴海
閬州應更有高樓

千里嘉陵江水色
含煙帶月碧於藍
今朝相送東流後
由此驅車更向南

贈宇文中丞

欲造中天正急材自緣煙水戀平臺人間只有嵇延祖
最望山公啟事來

閨情

紅露花房白蜜脾黃蜂紫蝶兩參差春窻一覺風流夢
却是同袍不得知

月夕

草下陰蟲葉上霜朱闌迢遞壓湖光兔寒蟾冷桂花白
此夜姮娥應斷腸

代應

本來銀漢是紅牆
隔得盧家白玉堂
誰與王昌報消息
盡知三十六鴛鴦

折楊柳二首

暫憑尊酒送無繆
莫損愁眉與細腰
人世死前唯有別
春風爭擬惜長條

含煙惹霧悔依依
萬緒千條拂落暉
為報行人休盡折
半留相送半迎歸

寄道士

共上雲山獨下遲
陽臺白道細如絲
君今併倚三珠樹
不記人間落葉時

荆山

壓河連華勢屨顏
鳥沒雲歸一望間
楊僕移關三百里
可能全是為荆山

次陝州

離思羈愁日欲晡
東周西雍此分塗
回鑿佛寺高多少

望盡黃河一曲無

過鄭廣文舊居

宋玉平生恨有餘
遠循三楚弔三閭
可憐留著臨江宅
異代應教庾信居

東下三旬苦於風土

路遠函關東復東
身騎征馬逐驚蓬
天池遼闊誰相待
日日虛乘九萬風

莫愁

雪中梅下與誰期
梅雪相兼一萬枝
若是石城無艇子
莫愁還自有愁時

夢令狐學士

山驛荒涼白竹扉
殘燈向曉夢清暉
右銀臺路雪三尺
鳳詔裁成當直歸

涉洛川

通谷陽林不見人
我來遺恨古時春
宓妃漫結無窮恨
不為君王殺灌均

有感

中路因循我所長
古來才命兩相妨
勸君莫強安蛇足
一盞芳醪不得嘗

宮妓

珠箔輕明拂玉墀
披香新殿鬪腰支
不須看盡魚龍戲
終遣君王怒偃師

宮詞

君恩如水向東流
得寵憂移失寵愁
莫向尊前奏花落

涼風只在殿西頭

代贈二首

樓上黃昏欲望休
玉梯橫絕月中鉤
芭蕉不展丁香結
同向春風各自愁

東南日出照高樓
樓上離人唱石州
總把春山掃眉黛
不知供得幾多愁

楚吟

山上離宮宮上樓
樓前宮畔暮江流
楚天長短黃昏雨

宋玉無愁亦自愁

瑤池

瑤池阿母綺窻開
黃竹歌聲動地哀
八駿日行三萬里
穆王何事不重來

柳

為有橋邊拂面香
何曾自敢占流光
後庭玉樹承恩澤
不信年華有斷腸

寄在朝四同年

昔歲陪遊舊跡多風光今日兩蹉跎不因醉本蘭亭在
兼忘當年舊永和

南朝

地險悠悠天險長金陵王氣應瑤光休誇此地分天下
只得徐妃半面粧

題漢祖廟

乘運應須宅八荒男兒安在戀池隍君王自起新豐後
項羽何曾在故鄉

韓冬郎二首

十歲裁詩走馬成，冷灰殘燭動離情。
桐花萬里丹山路，鵝鳳清於老鳳聲。


劍棧風檣各苦辛，別時冰雪到時春。
為憑何遜休聯句，瘦盡東陽姓沈人。

答寄餠粥

粥香餠白杏花天，省對流鶯坐綺筵。
今日寄來春已老，鳳樓迢遞憶秋千。

東阿王

國事分明屬灌均西陵魂斷斷來人
君王不得為天子
半為當時賦洛神



萬首唐人絕句卷四十

欽定四庫全書

集部

萬首唐人絕句卷四十一至三

詳校官庶吉士臣柳邁祖

助教臣常循覆勘

總校官編修臣王燕緒

校對官編修臣勵守謙

謄錄監生臣何大士

欽定四庫全書

萬首唐人絕句卷四十一

宋 洪邁 編

七言

過景陵

李商隱

武皇精魄久仙昇
帳殿淒涼煙霧凝
俱是蒼生留不得
鼎湖何異魏西陵

板橋曉別

回望高城落曉河長亭窻戶壓微波水仙欲上鯉魚去
一夜芙蓉紅淚多

關門柳

永定河邊一行柳依依長發故年春東來西去人情薄
不為清陰減路塵

楚宮

十二峯前落照微高唐宮暗坐迷歸朝雲暮雨長相接
猶自君王恨見稀

夕陽樓

花明柳暗繞天愁
上盡重城更上樓
欲問孤鴻向何處
不知身世自悠悠

鴛鴦

雌去雄飛萬里天
雲羅滿眼淚潸然
不須長結風波願
鎖向金籠始兩全

妓席送獨孤雲之武昌

疊嶂千重叫恨猿
長江萬里洗離魂
武昌若有山頭石

為拂蒼苔檢淚痕

武夷山

只得流霞酒一盃
空中簫鼓當時回
武夷洞裏生毛竹
老盡曾孫更不來

一片

一片瓊英價動天
連城十二昔虛傳
良工巧費真為累
楮葉成來不直錢

寄成都二從事

紅蓮幕下紫黎新
命斷湘南病渴人
今日問君能寄否
二江風水接天津

西南行却寄相送者

百里陰雲覆雪泥
行人只在雪雲西
明朝驚破還鄉夢
定是陳倉碧野雞

四老廟二首

羽翼殊勲棄若遺
皇天有運我無時
廟前便接山門路
不長青松長紫芝

本為留侯慕赤松漢庭方識紫芝翁蕭何只解追韓信
豈得虛當第一功

平公門下

梁山兗水約從公兩地差池一旦空謝墅庾村相弔後
自今岐路更西東

謝書

微意何曾有一毫空攜筆硯奉龍韜自蒙半夜傳衣後
不羨王祥得佩刀

齊宮詞

永壽兵來夜不扃
金蓮無復印中庭
梁臺歌管三更罷
猶自風搖九子鈴

夜吟

樹繞池寬月影多
村砧島笛隔風蘿
西亭翠被餘香薄
一夜將愁向敗荷

讀任彥昇碑

任昉當年有美名
可憐才調最縱橫
梁臺初建應惆悵

不得蕭公作騎兵

江上憶嚴五

征南幕下帶長刀
夢筆深藏五色毫
逢著滄江不敢詠
鎮西留與謝功曹

華州周大夫宴席

郡齋何用酒如泉
飲德先時已醉眠
若共門人推禮分
戴崇爭得及彭宣

相思

相思樹下合歡枝
紫鳳青鸞並羽儀
腸斷秦臺吹管客
日西春盡到來遲

送鄭大南觀

黎辟灘聲五月寒
南風無處附平安
君懷一疋胡威絹
爭拭酬恩淚得乾

舊頓

東人望幸久咨嗟
四海于今是一家
猶鎖平時舊行殿
盡無宮戶有宮鴉

代董秀才却扇

莫將畫扇出帷來遮掩春山滯上才若道團圓是明月
此中須放桂花開

有感

非關宋玉有微辭却是襄王夢覺遲一自高唐賦成後
楚天雲雨盡堪疑

驪山有感

驪岫飛泉泛暖香九龍呵護玉蓮房平明每幸長生殿

不從金輿唯壽王

別智玄法師

雲鬢無端怨別離十年移易住山期
東西南北皆垂淚却是楊朱真本師

贈孫綺新及第

長樂遙聽上苑鐘綵衣稱慶桂香濃
陸機始擬誇文賦不覺雲間有士龍

憶洪文館諸校書

清切曹司近玉除
比來秋興復何如
崇文館裏丹霜後
無限紅梨憶校書

亂石

虎踞龍蹲縱復橫
星光漸減水痕生
不須併礙東西路
笑殺厨頭阮步兵

春光

日日春光鬪日光
山城斜路杏花香
幾時心緒渾無事
得及游絲百尺長

過楚宮

巫峽迢迢舊楚宮
至今雲雨暗丹楓
微生盡戀人間樂
只有襄王憶夢中

龍池

龍池賜酒敞雲屏
羯鼓聲高衆樂停
夜半宴歸宮漏永
薛王沉醉壽王醒

即日

小鼎煎茶面曲池
白鬚道士竹間棋
何人書破蒲葵扇

記得南塘移樹時

吳宮

龍檻沉沉水殿清
禁門深掩斷人聲
吳王宴罷滿宮醉
日暮水漂花出城

嫦娥

雲母屏風燭影深
長河漸落曉星沉
嫦娥應悔偷靈藥
碧海青天夜夜心

殘花

殘花啼露莫留春
尖髻誰非怨別人
若但掩關勞獨夢
瑤釵何日不生塵

天津西望

戎馬崩騰忽一狂
翠華無日到東方
天津西望腸真斷
滿眼秋波出苑牆

西亭

此夜西亭月正圓
踈簾相伴宿風煙
梧桐莫更翻清露
孤鶴從來不得眠

憶住一師

無事經年別遠公
帝城鐘曉憶西峯
煙爐銷盡寒燈晦
童子開門雪滿松

昨夜

不辭鷓鴣妬年芳
但惜流塵暗燭房
昨夜西池涼露滿
桂華吹斷月中香

海客

海客乘槎上紫氛
星娥罷織一相聞
只應不憚牽牛妬

聊用支磯石贈君

初食笋

嫩籜香苞初出林於陵論價重如金
皇都陸海應無數
忍翦凌雲一寸心

寄蜀客

君到臨邛問酒壚近來還有長卿無
金徽却是無情物
不許文君憶故夫

海上

石橋東望海連天徐福空來不得仙直遣麻姑與搔背
可能留命待桑田

白雲夫舊居

平生誤識白雲夫再到仙簷憶酒壚
牆外萬株人迹絕夕陽唯照欲棲烏

同學彭道士參寥

莫羨仙家有上真仙家暫謫亦千春
月中桂樹高多少試問西河斫樹人

到秋

扇風浙瀝簟流漓萬里南雲滯所思
守道清秋還寂寞
葉丹苔碧閉門時

華師

孤鶴不睡雲無心衲衣筇杖來西林
院門晝鎖回廊靜
秋日當階柿葉陰

華嶽下題西王母廟

神仙有分豈關情八馬虛追落日行
莫恨名姬中夜沒

君王猶自不長生

過華清內廡門

華清別館閉黃昏
碧草悠悠內廡門
自是明時不巡幸
至今青海有龍孫

樂游原

萬樹鳴蟬隔斷虹
樂游原上有西風
羲和自趁虞泉宿
不放斜陽更向東

丹丘

青女丁寧結夜霜
羲和辛苦送朝陽
丹丘萬里無消息
幾對梧桐憶鳳凰

鳳

萬里峯巒歸路迷
未判容彩借山雞
新春定有將鸚鵡
樂阿閣華池兩處棲

游曲江

十頃平波溢岸清
病來唯夢此中行
相如未是真消渴
猶放沱江過錦城

卷四十一
櫻桃花下

流鶯舞蝶兩相欺不取花芳正結時他日未開今日謝
嘉辰長短是參差

故驛迎弔故桂府常侍

饑烏翻樹晚雞啼泣過秋原沒馬泥二紀征南恩與舊
此時丹旄玉山西

槿花

風露淒涼秋景繁可憐榮落在朝昏未央宮裏三千女

但保紅顏莫保恩

暮秋獨游曲江

荷葉生時春恨生
荷葉枯時秋恨成
深知身在情長在
悵望江頭江水聲

任洪農尉獻刺史

黃昏封印點刑徒
愧負荆山入座隅
却羨卞和雙刖足
一生無復沒階趨

贈勾芒神

佳期不定春期賒春物天闕興咨嗟願得勾芒索青女
不教容易損年華

月夜重寄宋華陽姊妹

偷桃竊藥事難兼十二城中鎖彩蟾應共三英同夜賞
玉樓仍是水精簾

訪人不遇

卿卿不惜瑣窓春去作長楸走馬身閒倚繡簾吹柳絮
日高深院斷無人

雨中送客不及

碧雲東去雨雲西苑路高高驛路低秋水綠蕪終盡分
夫君太騁錦障泥

池邊

玉琯葭灰細細吹流鶯上下燕參差日西徧繞池邊樹
憶把枯條撼雪時

賈生

宣室求賢訪逐臣賈生才調更無倫可憐夜半虛前席

不問蒼生問鬼神

送王十三校書分司

多少分曹掌秘文
洛陽花雪夢隨君
定知何遜緣聯句
每到城東憶范雲

寄惱韓同年二首

簾外辛夷定已開
開時莫放艷陽回
年華若到經風雨
便是西僧話劫灰

龍山晴雪鳳樓霞
洞裏迷人有幾家
我為傷春心自醉

不勞君勸石榴花

謁山

從來繫日乏長繩
水去雲回恨不勝
欲就麻姑買滄海
一杯春露冷如冰

鈞天

上帝鈞天會衆靈
昔人因夢到青冥
伶倫吹裂孤生竹
却為知音不得聽

失猿

祝融南去萬重雲清嘯無因更一聞莫遣碧江通箭道
不教腸斷憶同羣

戲題友人壁

花徑逶迤柳巷深小欄亭午轉春禽相如解作長門賦
却用文君取酒金

寄遠

姮娥搗藥無時已王女投壺未肯休何日桑田俱變了
不教伊水更東流

王昭君

毛延壽畫欲通神
忍為黃金不為人
馬上琵琶行萬里
漢宮長有隔生春

舊將軍

雲臺高議正紛紛
誰定當時蕩寇勳
日暮灞陵原上獵
李將軍是舊將軍

曼倩辭

十八年來墮世間
瑤池歸夢碧桃閒
如何漢殿穿針夜

又向窻中覩阿環

李衛公

絳紗弟子音塵絕
鸞鏡佳人舊會稀
今日致身歌舞地
木絲花暖鷓鴣飛

韋蟾

謝家離別正淒涼
少傅臨岐賸佩囊
却憶短亭回首處
夜來煙雨滿池塘

漫成五章

沈宗裁辭矜變律王楊落筆得良朋當時自謂宗師妙
今日唯觀對屬能

李杜操持事畧齊三才萬象共端倪集仙殿與金鑾殿
可是蒼蠅感曉雞

生兒古有孫征虜嫁女今無王右軍借問琴書終一世
何如旗蓋仰三分

代北偏師銜使節關東裨將建行臺不妨常日饒輕薄
且喜臨戎用草萊

郭令素心非贖武韓公本意在和戎兩都耆舊偏垂淚
臨老中原見朔風

戲題贈驛吏

絳臺驛吏老風塵耽酒成仙幾十春過客不勞詢甲子
唯書亥字與時人

寄池州李使君

七月十三夜

桂含爽氣三秋首
蕈吐中旬三葉新
正是澄江如練處
玄暉應喜見詩人

花下醉

尋芳不覺醉流霞倚樹沉眠日已斜
客散酒醒深夜後更持紅燭賞殘花

五月十五日夜聞京有燈

月色燈光滿帝都香車寶輦向通衢
身閒不覩中興盛羞逐鄉人賽紫姑

偶題二首

小亭閒眠微醉消山榴海栢枝相交
水紋簾上珊瑚枕

旁有墮釵雙翠翹

清月依微香露輕
曲房小院多逢迎
春叢定是饒樓夜
飲罷莫持紅燭行

月

過水穿樓觸處明
藏人帶樹遠含清
初生欲闕虛惆悵
未必圓時即有情

城外

露寒風定不無情
臨水當山又隔城
未必明時勝蚌蛤

一生長共月虧盈

景陽井

景陽宮井剩堪悲
不盡龍鸞誓
死期腸斷吳王宮
外水濁泥猶得葬西施

送阿龜歸華陽

草堂歸意背煙霞
黃綬垂腰不奈何
因汝華陽求藥物
碧松根下茯苓多

席上贈人

淡雲微雨恣高唐一曲清聲遠畫梁料得也應憐宋玉
只因無奈夢襄王

東南

東南一望日中烏欲逐羲和去得無且向秦樓棠樹下
每朝先覓照羅敷

假日

素琴絃斷酒瓶空倚坐歌眠日已中誰向劉伶天幕雨
更當陶令北窻風

縣中惱飲席

晚醉題詩贈物華
罷吟還醉忘歸家
若無江氏五色筆
爭奈河陽一縣花

縣宰禱雨

井膏滴滴是精誠
晝夜如絲一夕盈
抵怪閭閻喧鼓吹
邑人同報束長生

寄趙行軍

蓮幕遙臨黑水津
橐鞬無事但尋春
梁王司馬非孫武

且免宮中斬美人

萬首唐人絕句卷四十一

欽定四庫全書

萬首唐人絕句卷四十二

宋 洪邁 編

七言

送劉寰北歸

劉 商

南巢登望縣城孤
半是青山半是湖
知爾素多山水興
此回歸去更來無

送王閏歸蘇州

深山窮谷没人來邂逅相逢眼漸開
雲鶴洞宮君未到夕陽帆影幾時回

送人往虔州

莫歎乘輶道路賒高樓日日望還家
人到南康皆下淚唯君笑向此中花

送僧往湖南

閒出東林日影斜稻苗深淺映袈裟
船到南湖風浪靜可憐秋水照蓮花

送元使君自楚移越

露冕行春向若耶
野人懷惠欲移家
東風二月淮陰郡
唯見棠梨一樹花

移居深山

不食黃精不采薇
葛苗為帶草為衣
孤雲更入深山去
人絕音書雁自飛

送王永二首

君去春山誰共游
鳥啼花落水空流
如今送別臨溪水

他日相思來水頭

棉衣似熱袂衣寒時景雖和春已闌誠知暫別那惆悵
明日藤花獨自看

送別

灞岸青門有敝廬昨來聞道半丘墟陌頭空送長安使
舊里無人可寄書

送王貞

清陽玉潤復多才邂逅佳期過早梅槿花亦可浮杯上

莫待東籬黃菊開

送薛六暫游揚州

志在乘軒鳴玉珂
心期未快隱青蘿
廣陵行路風塵合
城郭新秋砧杵多

送楊行元赴舉

晚渡邗溝惜別離
漸看烽火馬行遲
千鈞何處穿楊葉
二月長安折桂枝

行營送人

鞞鼓喧喧對古城，獨尋歸鳥馬蹄輕。
回來看覓鶯飛處，即是將軍細柳營。

滑州送人先歸

河水冰消雁北飛，寒衣未足又春衣。
自憐漂蕩經年客，送別千回獨未歸。

送濬上人

木落前山霜路多，手持寒錫送頭陀。
眼看庭樹梅花發，不見詩人獨詠歌。

高郵送弟遇北遊

門臨楚國舟船路
易見行人易別離
今日送君心最恨
孤帆水下又風吹

送豆盧郎赴海陵

烟波極目已沾襟
路出東塘水更深
看取海頭秋草色
一如江上別離心

送女子

青娥宛宛聚為裳
烏鵲橋成別恨長
惆悵梧桐非舊影

不悲鴻鴈暫隨陽

酬道芬寄畫松

聞道鉛華學沈寧
寒枝浙澀葉青青
一株將比囊中樹
若箇年多有茯苓

山翁持酒相訪以畫松酬之

白社風霜驚暮年
銅瓶桑落慰秋天
憐君意厚留新畫
不著松枝當酒錢

題潘師房

渡水傍山尋絕壁白雲飛處洞門開
仙人來往行無跡
石徑春風長綠苔

謝自然却還舊居

仙侶招邀自有期九天升降五雲隨
不知辭罷虛皇日
更向人間住幾時

寄李甫

挂却衣冠披薜荔世人應是笑狂愚
年來漸覺鬢鬚黑
欲寄松花君用無

贈頭陀師

少壯從戎馬上飛
雪山童子未緇衣
秋山年長頭陀處
說我軍前射虎歸

贈嚴四草屨

輕微管蒯將何用
容足偷安事頗同
日入信陵賓館靜
贈君閒步月明中

題劉偃莊

何事退耕滄海畔
閒看富貴白雲飛
門前種稻三回熟

縣裏官人四考歸

題黃陂夫人祠

蒼山雲雨逐明神
唯有香名萬歲春
東風三月黃陂水
只見桃花不見人

題道濟上人房

何處營求出世間
心中無事即身閒
門外水流風葉落
唯將定性對前山

梨樹陰

福庭人靜少攀援
雨露偏滋影易繁
磊落紫香香亞樹
清陰滿地晝當軒

秋蟬聲

蕭條旅舍客心驚
斷續僧房靜又清
借問蟬聲何所為
人家古寺兩般聲

歸山留別子侄二首

車馬驅馳人在世
東西南北鶴隨雲
莫言貧病無留別
百代簪纓將付君

不逐浮雲不羨魚
杏花茅屋向陽居
鶴鳴華表應傳語
鴈度霜天懶寄書

與湛上人院畫松

水墨乍成巖下樹
摧殘半隱洞中雲
猷公曾住天台寺
陰雨猿聲何處聞

白沙宿竇常宅觀妓

楊子澄江映晚霞
柳條垂岸一千家
主人留客江邊宿
十月繁霜見杏花

上巳日縣察會集不遂馳赴

踏青看竹共佳期
春水晴山祓禊詞
獨坐郵亭心欲醉
櫻桃落盡暮愁時

懷張璪

苔石蒼蒼臨澗水
陰風裊裊動松枝
世間唯有張通會
流向衡陽那得知

與于中丞

萬頃荒林不敢看
買山容足擬求安
田園失計全蕪沒

何處春風種蕙蘭

表十五遠訪山門

僻居謀道不謀身
避病桃源不避秦
遠入青山何所見
寒花滿徑白頭人

行營病中

心許征南破敵歸
可言羸病臥戎衣
遲遲不見憐弓箭
惆悵秋鴻敢近飛

合谿水漲寄敬山人

共愛碧谿臨水住相思來往踐莓苔而今却欲嫌谿水
雨漲春流隔往來

不羨花

惆悵朝陽午又斜刺栽桃李學仙家花開花落人如舊
誰道容顏不及花

醉後

春草秋風老此身一瓢長醉任家貧醒來還愛浮萍草
漂寄官河不屬人

題水洞二首

桃花流出武陵洞，夢想仙家雲樹春。
今看水入洞中去，却是桃花源裏人。

長看巖穴泉流出，忽聽懸泉入洞聲。
莫摘山花拋水上，花浮出洞世人驚。

代人村中悼亡二首

花落茅簷轉寂寥，魂隨暮雨此中銷。
邇來庭柳無人折，長得垂枝一萬條。

卷四十二
虛室無人乳燕飛蒼苔滿地履痕稀庭前唯有薔薇在
花似殘粧葉似衣

觀獵三首

夢非熊虎數年間驅盡豺狼宇宙閒傳道單于聞校獵
相期不敢過陰山

日隱寒山獵未歸鳴弦落羽雪霏霏梁園射盡南飛鴈
淮楚人驚陽鳥啼

松月東軒許獨遊深恩未報復淹留梁園日暮從公獵

每過青山不舉頭

畫石

蒼蘚千年粉繪傳
堅貞一片色猶全
那知忽遇非常用
不把分銖補上天

詠雙開蓮花

菡萏新花曉並開
濃粧美笑面相隈
西方采畫嘉陵鳥
早晚雙飛池上來

夜聞鄰管

何事霜天月滿空
鸛鷄百轉向春風
鄰家思婦更長短
楊柳如絲在管中

山中寄元二侍御二首

心期汗漫卧雲扃
家計漂零水上萍
桃李向秋彫落盡
一枝松色獨青青

拖紫鏘金濟世才
知君倚玉望三台
深山窮谷無人到
唯有狂愚獨自來

上崔十五老丈

天漢乘槎可問津
寂寥深景到無因
看花獨往尋詩客
不為經時謁丈人

袁德師求畫松

柏偃松敝勢自分
森梢古意出浮雲
如今眼暗畫不得
舊有三株持贈君

早夏月夜問王開

清風首夏夜猶寒
嫩筍侵階竹數竿
君向蘇臺長見月
不知何似此中看

裴十六廳即事

主人能政訟庭閒
帆影雲峯戶牖間
每到夕陽嵐翠近
只言籬障倚前山

春日行營即事

風引雙旌馬首齊
曹南戰勝日平西
為儒不解從戎事
花落春深聞鼓鼙

畫樹後呈濬師

翔鳳邊風十月寒
蒼山古木更摧殘
為君壁上畫松柏

勁雪嚴霜君試看

弔從甥

日晚河邊訪惻獨衰柳寒蕪遠茅屋兒童驚走報人來
孀婦開門一聲哭

商山

曹松

垂白商於原下住兒孫共死一身忙木弓未得長離手
猶與官家射麝香

題院僧松

空山澗畔枯松樹老對禪堂鱗甲身傳是昔朝僧種着
下頭應有茯苓神

己亥歲二首

澤國江山入戰圖生民何計樂樵漁憑君莫話封侯事
一將功成萬骨枯

波間一戰百神愁兩岸強兵過未休誰道滄江總無事
近來長共血爭流

亂後入洪州西山

寂寂陰谿水激苔塵中將得苦吟來東峰道士如相問
縣尉而今不姓梅

送僧入廬山

若到江州二林寺遍遊應未出雲霞廬山瀑布三千仞
畫破青霄始落斜

江西逢僧

閩地高僧楚地逢伴遊蠻錫挂垂松白雲逸性都無定
纔出雙峰愛五峰

鍾陵寒食日郊外閒遊

可憐時節足風情
杏子粥香如冷餠
無奈春風輸舊火
遍教人喚作山櫻

中秋對月

無雲世界秋三五
共看蟾盤上海涯
直到天頭天盡處
不曾私照一人家

題李太尉平泉莊

汪遵

水泉花木好高眠
嵩少縱橫滿目前
惆悵人間不平事

今朝身在海南邊

戰城南

風沙刮地塞雲愁
平旦交鋒晚未休
白骨又沾新戰血
青天猶列舊旄頭

延平津

三尺晶熒射斗牛
豈隨凡手報冤讐
延平一旦為龍處
看取風雲布九州

項亭

不修仁德合文明
天道如何擬力爭
隅岸故鄉歸不得
十年空負拔山名

烏江

兵散子殘挫虎威
單鎗匹馬突重圍
英雄去盡羞容在
看却江東不得歸

綠珠

大抵花顏最怕秋
南家歌歇北家愁
從來幾許如君貌
不肯如君墜玉樓

升遷橋

漢朝卿相盡風雲
司馬題橋象又聞
何事不如楊德意
解搜賢哲薦明君

隋柳

夾浪分堤萬樹餘
為迎龍舸到江都
君看靖節高眠處
只向衡門種五株

楊柳

亞夫營畔柳濛濛
隋主堤邊四路通
攀折贈君還有意

翠眉輕嫩怕春風

桐江

光武重興四海寧漢臣無不受浮榮嚴陵何事輕軒冕

獨向桐江釣月明

招隱

罷聽泉聲看鹿羣丈夫才策合匡君早携書劍離巖谷
莫待蒲輪輾白雲

陳宮

椒宮荒宴竟無疑
倏忽山河盡入隋
留得後庭亡國曲
至今猶與酒家吹

樊將軍廟

玉輦曾經隔楚營
漢皇心怯擬休兵
當時不得將軍力
日月須分一半明

東海

漾舟雪浪映花顏
徐福携將竟不還
同作危時避秦客
此行何似武陵灘

昭君

漢家天子鎮寰瀛塞北羌人未罷兵
猛將謀臣徒自貴
蛾眉一笑塞塵清

五湖

已立平吳霸越功
片帆高颺五湖風
不知戰國官榮者
誰似陶朱得始終

澗池

西秦北趙各稱高
池上張筵列我曹
何事君王親擊缶

相如有劍可吹毛

函谷關

脫禍東奔壯氣摧馬如飛電轂如雷當時若不聽彈鋏
那得關門半夜開

詠酒二首

九醞松醪一曲歌本圖閒放養天和後人不識前賢意
破國亡家事甚多

萬事銷沉向一杯竹門啞軋為風開秋宵睡足芭蕉雨

又是江湖入夢來

蒼頡臺

觀跡成文代結繩
皇風儒教浩然興
幾人從此休耕釣
吟對長安雪夜燈

聽盛小叢歌贈崔侍御

李 約

繡衣奔命去情多
南國佳人歛翠娥
曾向教坊聽國樂
為君重唱盛叢歌

奉和

楊知言

燕趙能歌有幾人為花回雪似含顰聲隨御史西歸去
誰伴文翁怨九春

奉和

封彥冲

蓮府纔為綠水賓忽乘驄馬入咸秦為君唱作西河調
日暮偏傷去住人

奉和

盧鄴

何郎戴鷹別賢侯更吐歌珠宴庾樓莫道江南不同醉
即陪舟楫上京遊

奉和

高湘

謝安春渚餞袁宏千里仁風一扇清歌黛慘時方醕酹
不知公子重飛觥

奉和

盧澥

烏臺上客紫髯公共捧天書靜鏡中桃葉不須歌白苧
耶谿暮雨起樵風

奉和

崔元範

羊公留宴岷山亭洛浦高歌五夜情獨向柏臺為老吏

可憐林木響餘聲

思歸寄靈徹

韋丹

王事紛紛無暇日
浮生冉冉只如雲
已為平子歸休計
五老巖前必共聞

荅澈公

空山泉落松窻靜
閑地草生春日遲
白髮漸多身未退
依依常在永禪師

萬首唐人絕句卷四十二

欽定四庫全書

萬首唐人絕句卷四十三

宋 洪邁 編

七言

題弋陽館

張 祐

一葉飄然下弋陽，殘霞昏日樹蒼蒼。
吳谿漫汗干將劍，却是猿聲斷客腸。

題秀師影堂

陰陰古寺山松下記得長明一燭燈
盡日看山人不見影堂中是別來僧

贈李修源

岳陽新尉曉衙叅却是傍人意未甘
昨夜與君思賈誼長沙猶在洞庭南

瓜州聞曉角

寒耿稀星照碧霄月樓吹角夜江遙
五更人起烟霜靜一曲殘聲遍落潮

元日仗

文武千官歲仗兵萬方同軌奏昇平上皇一御含元殿
丹鳳門開白日明

連昌宮

龍鳳旌旗雨露飄玉樓吹斷碧山遥玄宗上馬太真去
紅樹滿園香自銷

正月十五夜燈

千門開鎖萬燈明正月中旬動帝京三百內人連袖舞

一時天上著詞聲

上巳樂

猩猩血綵繫頭標
天上齊聲舉畫橈
却是內人爭意切
六宮紅袖一時招

千秋樂

八月平時花萼樓
萬方同樂是千秋
傾城人看長竿出
一拔初成趙解愁

春鶯轉

興慶池南柳未開
太真先把一枝梅
內人已唱春鶯囀
花下傚傚軟舞來

大酺樂二首

車駕東來值太平
大酺三日洛陽城
小兒一伎竿頭絕
天下呼傳萬歲聲

紫陌酺歸日欲斜
紅塵開路薛王家
雙鬟笑說樓前鼓
兩仗爭輪好落花

邠王小管

虢國潛行韓國隨宜春深院映花枝
金輿遠幸無人見
偷把邠王小管吹

李謨笛

平時東幸洛陽城天樂宮中夜徹明
無奈李謨偷曲譜
酒樓吹笛是新聲

寧哥來

日映宮城霧半開太真簾下畏人猜
黃翻綽指向西樹
不信寧哥回馬來

孟才人歎

偶因歌態詠嬌嚙傳唱宮中十二春却為一聲河滿子
下泉須弔舊才人

鄴中懷古

鄴中城下漳河水日夜東流莫記春腸斷宮中望陵處
不堪臺上也無人

讀杜員外秋娘詩

年少多情杜牧之風流仍作杜秋詩可知不是長門閉

也得相如第一詞

杭州開元寺牡丹

濃艷初開小檠欄
人人惆悵出長安
風流却是錢塘寺
不踏紅塵見牡丹

招畫松石

咫尺雲山便出塵
我生長日自因循
憑君畫取江南勝
留向東齋伴老身

平陰夏日作

西來漸覺細塵紅
擾擾舟車路向東
可惜夏天明月夜
土山前面障南風

贈處士

小徑上山山甚小
每憐僧院笑僧禪
人間莫道無難事
二十年來已是玄

邠娘羯鼓

新教邠娘羯鼓成
大酺初日最先呈
冬兒指向貞貞說
一曲乾鳴兩杖輕

退宮人二首

開元皇帝掌中憐，流落人間二十年。
長說承天門上宴，百官樓下拾金錢。

歌喉漸退出宮闈，泣話伶官上許歸。
猶說入時歡聖壽，內人初着五方衣。

耍娘歌

宜春花夜雪千枝，妃子偷行上密隨。
便喚耍娘歌一曲，六宮生老是蛾眉。

悖拏兒舞

春風南內百花時
道唱梁州急遍吹
揭手便拈金椀舞
上皇驚笑悖拏兒

題靈徹上人舊房

寂寞空門支道林
滿堂詩板舊知音
秋風吹葉古廊下
一半繩牀燈影深

晚秋潼關西門作

日落寒郊烟物清
古槐陰黑少人行
關門西去華山色

秦地東來河水聲

贈內人

禁門宮樹月痕過
媚眼誰看宿燕窠
斜拔玉釵燈影畔
別開紅燭救飛蛾

洛中作

元和天子昔平戎
惆悵金輿尚未通
盡日洛橋閒處看
秋風時節上陽宮

折楊柳枝二首

莫折官前楊柳枝
玄宗曾向笛中吹
傷心日暮烟霞起
無限春愁生翠眉

凝碧池邊斂翠眉
景陽樓下綰青絲
那勝妃子朝元閣
玉手和烟弄一枝

華清宮四首

風樹離離月稍明
九天龍氣在華清
宮門深鎖無人覺
半夜雲中羯鼓聲

天闕沉沉夜未央
碧雲仙曲舞霓裳
一聲玉笛向空盡

月滿驪山宮漏長

紅樹蕭蕭閣半開
上皇曾幸此宮來
至今風俗驪山下
村笛猶吹阿濫堆

水遶宮牆處處聲
殘紅長綠露華清
武皇一夕夢不覺
十二玉樓空月明

贈竇家小兒

深綠衣裳小小人
每來聽裏解相親
天生合去雲霄上
一尺松栽已出塵

聽崔侍御葉家歌

宛羅重縠起歌筵
活鳳生花動碧烟
一聲吹斷無人和
觸破秋雲直上天

長門怨

日映宮牆柳色寒
笙歌遙指碧雲端
珠鈿滴盡無心語
強把花枝冷笑看

讀老莊

等閒緝綴閒言語
誇向時人喚作詩
昨日偶拈莊老讀

萬尋山上一毫釐

偶題

古來名下豈虛為
李白顛狂自稱時
唯恨世間無賀老
謫仙長在没人知

丁巳仲冬江上作

南來驅馬渡江濱
消息前年此月聞
唯是賈生先慟哭
不堪天意重陰雲

別玉華仙侶

遠舍烟霞為四鄰
寒泉白石日相親
塵機不盡住不得
珍重玉山上人

汴上送客

河流西下鴈南飛
楚客相逢淚濕衣
張翰思歸何太切
扁舟不住又東歸

郵亭殘花

雲暗山橫日欲斜
郵亭下馬對殘花
自從身逐征西府
每到花時不在家

秋時送鄭侍御

離鴻聲怨碧雲淨
瑟瑟調高清曉天
盡日相看俱不語
西風搖落數枝蓮

宿武牢關

行人候曉久徘徊
不待雞鳴未得開
堪羨寒溪自無事
潺潺一夜宿關來

宿盜浦逢崔昇

江流不動月西沉
南北行人萬里心
況是相逢鴈天夕

星河寥落水雲深

京城寓懷

三十年持一釣竿
偶隨書薦入長安
由來不是求名者
唯待春風看牡丹

集靈臺二首

日光斜照集靈臺
紅樹花迎曉露開
昨夜上皇新授籙
太真含笑入簾來

虢國夫人承主恩
平明騎馬入金門
却嫌脂粉污顏色

淡掃蛾眉朝至尊

感歸

行却江南路幾千歸來不把一文錢鄉人笑我窮寒鬼
還似襄陽孟浩然

偶作

徧識青霄路上人相逢祇是語逡巡可勝飲盡江南酒
歲月猶殘李白身

勸飲酒

燒得硫黃漫學仙未勝長付酒家錢
寶常不喫齊推藥却在人間八十年

阿鷓鴣湯

月照宮城紅樹芳綠
窻燈影在雕梁
金輿未到長生殿
妃子偷尋阿鷓鴣湯

馬嵬坡

旌旗不整奈君何
南去人稀北去多
塵土已殘香粉艷
荔枝猶到馬嵬坡

太真香囊子

感金妃子小花囊銷耗
胃前結舊香誰為君王重解得
一生遺恨繫心腸

雨霖鈴

雨霖鈴夜却歸秦猶見張徽
一曲新長說上皇和淚教
月明南內更無人

聽歌二首

兒郎漫說轉喉輕須待情來意自生
只是眼前絲竹和

大家聲裏唱新聲

十二年前邊塞行坐中無語歎歌情不堪昨夜先垂淚
西去陽關第一聲

聽箏

十指纖纖玉筍紅鴈行輕過翠絃中分明似說長城苦
水咽雲寒一夜風

王家琵琶

金屑檀槽玉腕明子絃輕撚為多情只愁拍盡涼州破

畫出風雷是撥聲

李家柘枝

紅鉛拂臉細腰人
金繡羅衫軟着身長
恐舞時殘拍盡
却思雲雨更無因

楚州韋中丞筵篋

千重鈎鎖撼金鈴
萬顆真珠瀉玉瓶
恰值滿堂人欲醉
甲光纔觸一時醒

邊上逢歌者

垂老秋歌出塞庭
過雲相付舊秦青
少年翻擲新聲盡
却向人前側耳聽

聽李簡上人吹蘆管二首

細蘆僧管夜沉沉
越鳥巴猿寄恨吟
吹到耳邊聲盡處
一條絲斷碧雲心

月落江城樹繞鴉
一聲蘆管是天涯
分明西國人來說
赤佛堂西是漢家

塞上聞笛

金瓶梅詞話卷四十三
卷四十三
一
一夜梅花笛裏飛
冷沙晴檻月光輝
北風吹盡向何處
高入塞雲燕鴈稀

經舊遊

去年來送行人處
依舊蟲聲古岸南
斜日照谿雲影斷
水蒨花穗倒空潭

東山寺

寒色蒼蒼老柏風
石苔清滑露光融
半夜四山鐘磬盡
水精宮殿月玲瓏

峰頂寺

月明如水山頭寺
仰面看天石上行
夜半深廊人語定
一枚松動鶴來聲

潤州鶴林寺

古寺名僧多異時
道情虛遣俗情悲
千年鶴在市朝變
來去舊山人不知

勝上人山房

清畫房廊山半開
一瓶新汲灑莓苔
古松百尺始生葉

颯颯風聲天上來

李夫人詞

延年不語望三星莫說夫人上涕零爭奈世間惆悵在
甘泉宮夜看圖形

金陵渡

金陵津渡小山樓一宿行人自可愁潮落夜江斜月裏
兩三星火是瓜洲

過陰陵

壯士悽惶到山下行人惆悵上山頭生前此路已迷失
寂寞孤魂何處遊

縱遊淮南

十里長街市井連月明橋上看神仙人生只合揚州死
禪智山光好墓田

登樂遊原

幾年詩酒滯江干水積雲重思萬端今日南方惆悵盡
樂遊原上見長安

過石頭城

累累墟墓葬西原
六代同歸蔓草根
唯是歲華流盡處
石頭城下水千痕

黃蜀葵

名花八月嫩黃金
色照書窗透竹林
無奈美人閒把嗅
直疑檀口印中心

楊花

散亂隨風處處勻
庭前幾日雪花新
無端惹着潘郎鬢

驚殺綠窻紅粉人

薔薇花

曉風抹盡燕支顆
夜雨催成蜀錦機
當晝開時正明媚
故鄉疑是買臣歸

戲顏郎中獵

忽聞射獵出軍城
人着戎衣馬帶纓
倒把角弓呈一箭
滿川狐兔當頭行

失鷺鷥

李歸唐

惜養從來歲月深
開籠不見意沉吟
也知祇在秋江上
明月蘆花何處尋

伍相廟

常雅

蒼蒼古廟映林巒
霧霧烟霞覆石壇
精魄不知何處在
威風猶入浙江寒

贈玉簫

韋臯

黃雀銜來已數春
別時畱醉贈佳人
長江不見魚書至
為遣相思夢入秦

題黃花驛

薛逢

孤戍迢迢蜀路長
烏鳴山館客思鄉
更看絕頂烟霞外
數樹巖花照夕陽

涼州詞

昨夜蕃軍報國讐
沙州都護破涼州
黃河九曲今歸漢
塞外縱橫戰血流

觀獵

馬縮寒毛鷹落膽
角弓初暖箭新調
平原踏盡無禽出

竟日翻身望碧霄

狼烟

三道狼烟過磧來
受降城上探旗開
傳聲却報邊無事
自是官軍入抄回

俠少年

綠眼鷓鴣踏錦鞵
五花驄馬白貂裘
往來三市無人識
倒把金鞭上酒樓

感塞

滿塞旌旗鎮上游各分天子一方憂無因得見哥舒翰
可惜西山十八州

聽曹剛彈琵琶

禁曲新翻下玉都四絃振觸五音殊不知天上彈多少
金鳳銜花尾半無

定山寺

十里松蘿映碧苔一川晴色鏡中開遙聞上界翻經處
片片香雲出院來

夢入瓊臺

許灑

曉入瑤臺露氣清
天風飛下步虛聲
塵心未盡俗緣在
十里下山空月明

題禪窟寺

陳季卿

霜鐘鳴時夕風急
亂鴉又望寒林集
此時輟棹悲且吟
獨對蓮華一峰立

詠篙水濺妓衣

裴虔餘

滿額蛾黃金縷衣
翠翹浮動玉釵垂
從教水濺羅裙濕


知道巫山行雨歸

浪淘沙二首

皇甫松

灘頭細草接疎林，浪惡雷船半欲沉。
宿鷺眠洲非舊浦，去年沙觜是江心。

蠻歌苴寇北人愁，松雨蒲風野艇秋。
浪起鷓鴣眠不得，寒沙細細入江流。



萬首唐人絕句卷四十三